

Ahad, 17 Mei 2020 | 11:57am



Timbalan Menteri Perdagangan Dalam Negeri dan Hal Ehwal Pengguna, Datuk Rosol Wahid memeriksa barangan mentah di Pasaraya Sena dan Pasaraya Hiper Giant di Kangar.- Foto NSTP/Dziyaul Abdul Rahman

103 notis amaran dikeluarkan di seluruh negara

Dziyaul Afnan Abdul Rahman
bhnews@bh.com.my

KANGAR: Sebanyak 103 notis amaran sudah dikeluarkan oleh Kementerian Perdagangan Dalam Negeri dan Hal Ehwal Pengguna (KPDNHEP) terhadap peniaga yang menaikkan harga barangan di seluruh negara sejak semalam.

Timbajan Menteri Perdagangan Dalam Negeri dan Hal Ehwal Pengguna, Datuk Rosol Wahid berkata, tindakan itu susulan laporan daripada pengguna berhubung beberapa barangan segar seperti ayam yang dijual di pasaran pengguna mengalami kenaikan harga mendadak dalam seminggu.

Menurutnya, jumlah pengeluaran notis itu dijangka meningkat dari semasa ke semasa memandangkan musim perayaan Aidilfitri bakal menjelang tidak lama lagi.

"Keperluan barangan ini seperti ayam dan sebagainya adalah mencukupi malah saya juga sudah meminta pembekal menambahkan jumlah bekalan ke setiap negeri berikutan musim perayaan.

"Cuma apa yang kita dapati harganya mengalami sedikit kenaikan, namun kita sudah mengeluarkan notis sejak semalam kepada peniaga yang sengaja menaikkan harga barangan agar mereka ini dibawa ke muka pengadilan," katanya ketika ditemui di Pasaraya Hiper Giant, Bukit Lagi, di sini hari ini.

Semalam, beberapa negeri di Semenanjung melaporkan kenaikan harga barangan mentah secara mendadak dalam seminggu di pasaran seperti ayam dan beberapa keperluan barangan lain.

Harga yang dijual ketika ini adalah antara RM8 sehingga ke RM9.60 bagi sekilogram ayam manakala barangan mentah seperti santan dan sayuran turut mengalami kenaikan harga berbanding sebelumnya.

Mengulas lanjut, Rosol berkata ketika ini di Terengganu mencatatkan kenaikan harga ayam yang mendadak berbanding negeri yang lain.

"Di Terengganu harganya mencecah RM9.60 bagi sekilogram ayam sedangkan harga siling yang dijual sebelum ini adalah antara RM6 dan ke bawah.

"Namun kita menasihati pengguna agar menjadi pengguna yang bijak dengan membeli beberapa barangan mengikut keperluan atau barangan mentah lain yang lebih rendah harganya," katanya.

Sementara itu, Rosol berkata pihaknya masih belum menerima sebarang maklum balas daripada hospital swasta di ibu negara yang dilaporkan menjual sekeping pelitup muka sehingga RM11.20 kepada pengguna.

<https://www.bharian.com.my/berita/nasional/2020/05/689743/103-notis-amaran-dikeluarkan-di-seluruh-negara>